

**Naaja H. Nathanielsen
Attaviitsoq**

**UPA2016/23
15. april 2016**

Qalerallit akitsuutaat aamma aalisakkat ikerinnarsiortut ilaasa Tunumi aalisarnermi pisarineqartut akitsuutaat pillugit Inatsisartut inatsisaata allanngortinneqarnera pillugu Inatsisartut inatsisaat nr. x, xXx 2016-imeersoq. (Saarullit, kullerit, saarulliusaat aamma suluppaakkat akitsuutaat)

(Aningaasaqarnermut Aatsitassanullu Naalakkersuisoq)

Inatsisissatut siunnersuut assersuutaasinnaavoq takorluugaqanngissusermut qanittuinnarmullu atasinnaasumut anguniagaqarnermut.

Inatsisissatut siunnersuut taamaallaat ulluni aqqanilinni tusarniutigineqarsimavoq - tamannalu isornarluinnarpoq. Naalakkersuisut ulapinneq utoqqatsissutigivaat. Utoqqatsissulli tamanna atorsinnaangilaq. Naalakkersuisut tusarniaanissamik ingerlatsinissaminnut naammattumik piffissaliisinnaangikkunik, inatsisissatut siunnersuummik kinguartitsisariaqarput. Pitsaasumik ingerlatsineq aserorneqassangilaq Naalakkersuisut aningaasameernerannit.

Ersarilluinnarpoq inatsisissatut siunnersuut una aningaasameernermit tunngaveqartoq. Inatsisissamik siunnersuuteqartoqarpoq karsi imaqanngimmat, sukkasuumillu aningaasanik nassaartoqartariaqarmat. Aamma aningaasarpassuarnilluunniit allaffissornerujussuarmilluunniit akeqassagualuarpat, aningaasanik isaatitsiniarneq.

Naalakkersuisut naatsorsuutigaat akitsuutitigut 18 mio koruunit isertissinnaajumaarlugit, taamaanneranilu aamma akileraartarnikkut isertitassaagaluit 10 mio koruuninit ikinnerunngitsut annaanissaat aamma naatsorsuutigalugu. Tamanna tunngaveqarpoq inuttat akissarsiakinnerulissammata, taamaattumillu akileraarutaat ikinnerulissallutik. Inatsisissatut siunnersuutip akileraartarnermut aqutsisoqarfimmi allaffissornerup aningaasartuutaalernerulernissaanik kinguneqassasoq aamma naatsorsuutigineqarpoq. Naalakkersuisut akeqquneqarput inatsisissatut siunnersuut allaffissornikkut qanoq aningaasartuutaatigissanersoq.

Ajornartorsiuteqarfiginngilara tamatta pisuussutitta akitsuusersornissaat. Kisianni ajornartorsiuteqarfigaakka akitsuutit eqqarsaatersuutigilluarneqarsimannngitsut. Akitsuusersuinerit landskarsimi amigartoorut apeqqutaatillugu angissusilersorneqartut ajornartorsiuteqarfigaakka.

Siunnersuut itigartippara. Naalakkersuisut suliainnik uteqqiisariaqarput, siunnersuusiorlutillu eqqarsaatersuutigineqarluarnerusumik naammattumillu tusarniaaffigineqarnermigut ingerlanneqartumik.